

味檠齋文集
一〇





味 檠 齋 文 集

(十)

趙 南 星 著

味槩齋文集卷十一

墓誌銘

明吏部尙書贈太子太保孫清簡公墓誌銘

萬厯二十二年甲午七月五日孫清簡公卒於家其弟文融寓書於余曰兄之知先兄甚深癸巳之事兄爲司功親見之銘其墓者匪兄不可第此時同事者俱在尙未可直書以俟異日余報之以不敢讓也至丁巳春公之子比部君來以文融所爲狀徵前諾時余六十八矣病初起比部別後遂成久病不復能爲文而念平生知己無過於公者且內察國家之大事史冊所必載卽文融爲狀未若予知之之真也非余銘之而誰也孫公者文恪公之長子忠烈公之孫也諱鑑字文中號立峰九歲卽能讀書長而彌勤誦習每踰丙夜倦欲臥起稍行數十步誦習如故十九舉順天鄉試是歲嘉靖二十二年也四試禮部不第益發憤竟夕不臥矣如此者三年而登進士授兵部武庫主事提督武學武學多貴介子弟而都城諸浮薄好射獵者亦多繫籍其中以權力口語抗法約公生長京師又兄都督公舊在武學稔知之較試賞罰無所假借適值六年會舉之期此惟京衛武學有之皆取世官及胄子肄業久而屢試高等者合試之拔其

儻可百人。尙書以聞。候詔下。錄入職方籍。以次擢用。曩多徇情。或例外間有闌入。公一稟於令甲。視文義去爲取。一中貴家兒。每月試不來。公特抑之。權家多失望者。比奏將上。尙書欲易一人而不肯也。時同邑宋公岳爲武庫郎中。旣退。呼公曰立峰。吾自今畏汝矣。豈有上官嘔嘔言。而面赤強爭者乎。疏上。踰日留中。同事者皆危懼。公不爲動。已而竟下。是時上獨攬乾綱。左右無敢作威福者。第姑遲發示虛喝耳。公繇此名大起。後中貴家兒亦得舉。曰吾本末跡學宮。豈敢怨吾師乎。遷職方員外郎。尙書蒲州楊襄毅公自邊鎮入。極重公。公亦甚服楊公忠義磊落。應事敏而悉中。先朝馬端肅。余肅敏。未必能絕也。時郎中偶病。公署事。所言皆聽。然楊公微有變通。公所執堅。每曲意從之。以遭文恪公之喪歸。廬墓三年。起補原職。楊公猶在兵部。旋遷武庫。協司郎中。是時上在位四十二年矣。日決事齋宮。精明威斷。華亭徐文貞公當國。正己親賢。仕路肅清。然臣下懷懷畏罪。士氣亦少瑟縮矣。公乃上疏。勸上時出視朝。無爲左右所蔽。及方士邪說不可用。引趙高林靈素等爲喻。其刺及諸宦寺尤多。於時在位聞者。無不駭異。而好事者間造僞疏。故爲危論。於是人人累息。惟恐禍且不測。而蔓延及己也。卽徐楊二三老。嘉其直。亦慮支持收拾之難。然諸宦寺之恐懼尤甚。竟壅之不得達。公遂以病乞歸。武選主事宣化鄧君洪震。賦寶劍篇爲贈。以告其同年友戶部主事海忠介公。後海公上疏。大略與公意同。上遂馮怒。然留半歲不發。袖其疏時出視之。意似少悟。而諸宦寺造飛語激上。竟下獄當罪。而海公名繇是震天下矣。隆慶元年。起南文選郎中。時南署

尙風節。每事必欲鏘鏘爲不可犯。以是與尙書麻城劉端簡公抵牾。公力持平其間。聊合之。劉公寓書楊公稱之。時楊公已改吏部矣。欲調爲己屬。而媚之者構他語沮格。遂已。已而海公巡撫至應天。見公曰。僕頃者實聞先生之風而起。時海公風采甚峻。人不能堪。公微諷之。卒不入。擢南尙寶卿。五年秩滿入京。時楊公罷歸。復起兵部。而少師新鄭高公以政府掌吏部。見公示意欲北之。公竟爲不領也者而去。明年遷南鴻臚寺卿。萬曆三年考滿入京。改太常寺少卿。尋遷右通政。明年督光祿寺卿。又明年江陵相姻權擅朝。不喪其父。杖戍諸言者。所爲益橫。公因乞病歸。家居七年。丁母楊夫人憂。十四年服闋。江陵已物故矣。起補原職。明年遷大理卿。又明年遷刑部侍郎。尋改吏部侍郎。十八年遷南吏部尙書。改南兵部。二十年壬辰。平湖陸莊簡公解吏部去。會推左都御史涇陽李敏肅公。兵部尙書東明石公。上謂世達方秉正力肅憲職。不可動。而西鎮叛卒告急。星亦未宜他徙。可再推。乃推工部尙書廬陵曾公。刑部尙書富平孫公。及公。旨數日不下。旣乃特用公焉。當此時。上深居頤養。內外隔絕。內閣爲太倉王公錫爵。蘭谿趙公志皋。新建張公位。用人行政。一以委之。三公者不敢爲江陵之事。而欲權歸於己。稍有識者莫不離遯自疎。以陸公智術高。不可籠駕。故謀去之。而李公練習恢卓。虛懷下士。人望所歸。又爲其所忌。公淵穆不測。且家居及在留都之時多。卽嘉靖中上疏事。彼亦未必聞也。故拔之冀爲己用。未幾輒悔之矣。先是在內閣者。每欲參預吏部之事。而吏部亦以代庖假器爲恥。恆至岨嶂。宏治間推舉者。奉旨駁問。有一官而推至二

十餘次者不得已。乃令選郎關說。嘉靖末年。分宜大鬻爵。亦但爲請寄耳。及江陵奪情之後。而尙書恆自往受教矣。卽陸公亦不能盡改也。至公乃絕不往。又故事。吏部尙書道遇內閣不避。避之自嘉靖中李肅愍始。至陸公不避矣。然亦密有所透迤。至公而絕不避。三公積不能堪。新建乃上疏言。會推大臣。與推者各舉所知。類奏取自上裁。以此爲定國是。公按令甲議覆。以爲大臣黜歷既久。才品已定。會推時皆得直言可否。此爵人於朝之義。守舊爲是。刑科左給事中史君孟麟。則上疏直駁之。言太祖罷中書省。以六部分庶務。恐其專也。然職旣定。則又恐其不專。專而不效。則罪有歸矣。今以六部之權。合而收之禁密。旨繇閣票。或有私意。姦其間者。悉託之上意。誰執其咎。乃所以資專擅也。新建益大怒。以史君之疏。有所使之者。而其讎吏部不可解矣。明年大計京官。當在正月內舉事。議皆預定。二三宵小輩爲相君出力者。皆借條陳侵吏部。欲以決隙致潰。公屹不爲動。三公旣不得見公。其必不可免者。乃託人求免。公皆佯應之。其他縉紳所指目。八狗三羊之類尙多。如稍不密。則此輩蠶起而譁釗矣。此時惟李愍肅公僉都王公汝訓。與公同心。吏科都給事中。及河南道二人。會同考察者。皆不得盡知也。及榜出。政府旣盡喪其私人。臺省又以不得與聞。交恨之。公故無暱客。惟一至親爲司屬。衆皆掇之以挾公。公亦爲謫之矣。卽他司屬所處者。亦倍於往時。故無所得其巖。咸相謂曰。我臺省何甘折氣。今當拾遺。仍拾吏部耳。乃上疏拾三人。稽勳司員外虞君淳熙。清苦之士。公所用爲司屬者。楊君子庭。職方司郎中。少年負才氣。慷慨任事。西鎮蕩平。

方當錄功。二君皆不可動。惟兵部主事袁黃者。輿論未協。宜降。然方從征朝鮮。取自上裁。覆上。三公故擬旨俱留用。於是刑科給事中劉君道隆上疏。以爲臺省交章糾拾。不爲不公。何乃不去一人。詔切責吏部。專權結黨。令回奏。公具疏如前所云。則又得嚴旨。回奏竟不伏罪。明是專權。堂上官奪俸三月。考功司郎中降三級。調外任。虞淳熙等三人俱閒住。給事中疏不指名。亦奪俸二月。於是公上疏求去。有旨不允。公以身去。無須多言。顧權黨之說。不可令遺患將來。乃上疏曰。人臣之罪。莫大於專權。國家之禍。莫烈於結黨。夫權者。人主之操柄也。人臣所司。謂之職掌。吏部以用人爲職。進退去留屬焉。然必請旨而後行。則所謂權者。固自有在。非可得專也。今以留二庶僚爲專權。則無往非專矣。黨之一字。漢唐宋顛覆之原。奈之何其以爲戲。凡科道論劾。下部覆議。例有去留。今以留二京屬爲結黨。則無往非黨矣。昔之專權結黨者。往往有之。並不在銓曹。誠使自臣而始。臣之大罪也。卽如以專權結黨爲嫌。畏縮消懦。自救不暇。則銓曹之輕。自臣而始。亦大罪也。臣任使不效。徒潔身而去。使專權結黨之說。終不明於世。將來者且以臣爲戒。又大罪也。臣憂結於中。不忍默默。伏望陛下特加省察。并賜骸骨。詔報聞。仍不令去。而都察院李公。王公。同疏救余。詔切責市恩羣小。余及虞君等俱削籍。於是左僉都王公。又專疏救之。而右通政魏公允貞。大理左少卿曾公乾亨。吏部主事顧君憲成。李君復陽。禮部郎中于君孔兼。員外郎陳君泰來。主事顧君允成。張君納陛。戶部主事賈君巖。國子監助教薛君敷教。上疏論救。俱歸咎內閣。而刺譏太倉新建尤甚。王

公等及吏部二君疏皆留中。五君降三級調外任。而禮部郎中何君喬遠主事洪君啓睿復同疏爭之。石公亦上疏爲楊職方昭洒無受賄事。願以己官贖之。會吏科都給事中缺。推史君命已下。不出。乃上疏云。出則當首言考功之事。必不聽。且臣乃考功之黨也。豈得獨留。況復患病。有旨令之去。公既辨權黨之說。遂稱病不出。三公擬旨。或溫或厲。至以司官不肯認罪。不能救正。爲無人臣禮。又遣中官齎上尊少牢視焉。公堅不肯出。自三月至七月。疏十上。乃得俞旨。乘傳歸。是役也。人皆云孫公無私。考察乃國家重典。所斥者卽終身禁錮。此而或私。則必其無良心者耳。以此稱公。是譽宋姬以不淫也。公之意蓋以除姦爲主。貪次之。夫貪者汚朝之臣也。姦人附權傷善。賊國之臣也。故嚴於要津。而寬於散秩。士紳坐年老去者三人。皆緣他議。而微之以老。有疾者卽卑宄吏亦止四人耳。曰彼方憂性命。而忍復煎迫之乎。至者任子者非有大過。其祖父賢。則容之以爲善人之勸。繇斯以談。殆不止於無私也。公去。無何李公亦以他事遭讒去。公同邑陳恭介公自南吏部來代之。閣部矛盾益甚。先是公未至時。選郎王君教以推建言降調御史。萬君國欽爲推官。一司皆削籍。欲以立威愆後。而衆益不服。後遂屢行之。此江陵所未有也。陳公至未久。卽稱病數月去。自是吏部用人之疏。多竟留中者。官職曠廢。尙書自奉新蔡公之外。率以爲固然。莫肯去者。旣而三公皆被彈射去。政府無可票擬。閣部俱輕。而二三見臺省以口舌爲權。悉逐異己者。丙辰丁巳之察。吏部俛首而唯阿。善類無遺餘。其在林下者三十年之間。零落殆盡。存者亦多衰老。值建酋稱亂。師

瘞地削海內騷離。今上卽位。求救反絕。有如弗及。然無能折衝厭難者。公典銓非久。流品頓清。而終歸於亂。此秦誓所以思一个臣也。公生於嘉靖四年十月十一日。年七十而歿。詔與祭二壇。遣工部主事錢允元治葬。謚清簡。惟贈廕命久不下。吏部屢催。至二十七年乃下。贈太子太保。錄一子入太學。文恪公生五男。初娶韓夫人。生公。及南京禮部右侍郎正峰公鋌。繼娶楊夫人。生太僕卿鶴峰公鏞。及南京兵部尙書月峰公鏞。卽文融側室馬生庠生鏞。公娶錢夫人。御史後峰公女。生二男。長如法。癸未進士。刑部主事。以言儲宮事。謫潮陽縣典史。娶編修史公鈞女。次如洵。卽比部君。癸丑進士。娶江西僉事陳公成甫女。一女適湖廣副使管公稷子太學生可成。如法生一女。適江西僉事史君元熙子庠生孝豪。如洵生四男二女。長男某。聘舉人陳君本欽女。次男某某。長女適舉人周君昌憲子宗翰。次字舉人夏君汶子良樸。夏山陰人。餘皆同邑人。如法等以某年某月某日葬公於府城北梅山。至今天啓二年壬戌三月。余乃爲銘其墓。銘曰。

忠烈之後。宜其丕興。卿相蔑也。至人爲徵。上古之士。無懷大庭。人有惡心。除之則貞。性道合一。匪善之行。人孰無機。去之則誠。物我同觀。鷗鳥可從。閉修強學。非以立名。眈眈穆穆。無可與爭。芝耀其華。蘭播其馨。世之君子。未可同稱。薄遊從凡。惟化是乘。卑疎尊近。其儀有恆。忠義內激。洪河可馮。相臣質難。大則弗容。博選天官。非力克勝。樂其平易。不知而庸。統均失官。極於江陵。守正爲悔。蠟趲所形。大計羣吏。諂子營營。

撓臆丐免。而曾莫聽。黃閣愧恥。昔重今輕。及其餘耦。殫力以抨。皇天未怒。晴日雷霆。三卻鉤羅。鴻飛高冥。正直發憤。罔不怵怵。貶逐不已。有耳如荅。公歸逾年。往依先靈。卹祿隆厚。孰好孰憎。哀哉若人。遭隆聖明。放逐律魁。破毀太平。爰至今茲。禍亂遂成。暗醜須臾。有譽斯榮。厥惟幸哉。伊余之生。得所依歸。退遂咸并。世逾二紀。吾黨彫零。癸巳之事。可爲沾纓。傳信無人。惇史焉憑。余七十三。性命未傾。天實留之。俾勒此銘。

明故兵部尙書東泉石公墓誌銘

石公之歿也。十有六年矣。蓋己亥九月七日也。時公之子茂恩適戊柳州。明年庚子冬。始得請急奔喪。又明年辛丑春抵家。不敢久留。輒去。至客歲癸丑。乃以狀及友人鄒爾瞻所爲傳。李純之中丞穆仲裕中書書來。徵志銘於趙子。趙子曰。嗟乎。石公。予何忍爲公銘也。何忍不爲公銘也。顧何以爲公銘也。嗟乎難言哉。今上冲年。爲江陵所欺。壬午江陵死。乃覺而罪之。銳意思治。朝講甚勤。而將相未盡得人。辛卯以公尙書兵部。明年春。甯夏將士據城反。未平。而倭躋朝鮮。國王逃去。告急於我。朝議出兵救之。此時政府三人。太倉乞假還里中。未歸。蘭谿當國。新建次之。用一妄庸大臣。經略朝鮮。郭侍御實爭之。貶官。經略竟以無功效罷。時久戍海外。疫多糧乏。而朝鮮亦苦旱。於是。有言倭畏威欲求封者。上下部議。公初主剽。旣而念此民窮財盡。從事外夷。非策也。不若予之封便。會不知何蠻髻曰小西飛者。上書求封貢。公遂決意主封。所使偵倭朝鮮者。所報皆詐。謂倭實畏威。欲得封。卽罷兵。於是上遣臨淮李侯往封倭。倭不受。曰。

孰欲封者。羈小侯。小侯脫而歸。上遂大怒。繫公獄。妻子戍廣西。嗟乎石公誤矣。豈非命哉。夫效忠在於相時。樹績必於多助。公之主封也。無一贊決者。以爲此所關重大。固兵部事。賞不分。計罰可坐觀也。侍郎李公楨。心謂不可。不以去就爭之。而第不列名於疏。莫知此爲何法。彼賢者猶若是。上信任公極專。有言倭不可封者。絕不聽。公亦不悟。豈非命哉。論者率以公誤國。夫古之誤國者。率欲自利。公則誤身矣。夫何利焉。故曰爲忠甚易。得宜實難。古之以忠被戮者多矣。公以穆宗元年爲吏科給事中。上言六事。曰養聖躬。講聖學。勤視朝。速俞允。廣聽納。察讒譖。語侵大璫。滕祥。祥侍穆宗藩邸者也。廷杖公六十。以祥監杖。其黨俱持杖亂擊之。友人工部員外郎穆公文熙。橫身擁蔽。昇歸邸舍。經一晝夜始甦。穆公遂與石公同舟歸里。石公之元配鄭。聞石公杖斃。觸柱而死。當此天下無賢愚。識不識。皆稱石穆之義。夫石公豈非忠臣哉。遭逢今上聖明。而自誤得罪。豈非命哉。壬辰之季冬。太倉再入朝。欲以撓京察。庇私人。於東征事無所匡拂。其人偏狹詐佞。早年有虛譽。上極重之。江陵死後。特徵起田間。彼疏中以湯求一德自況。其爲相行事。皆出私心客氣。卒被劾去。上猶思之。再被徵。言者蜂起。不許其來。會病死。繇斯以談。上未嘗不欲用賢。致治安。太倉以伯繇傷帝堯之明。而石公以朴忠爲人所誤。自是上以天下無一忠賢可任。庶官可有可無。不足爲意。有言皆不聽。蓋天之不欲天下治安也。卽石公亦莫知所繇然。方甯夏之叛。余見世道人心之敝。勸公歸。公不聽。及劉貽哲視公獄中。乃曰。吾悔不用夢白之言。蓋甯夏幸而平。公以天下事尙可爲。故

不去。豈非天哉。方九卿臺省會議封倭時。人人皆瞪而向石公。莫肯先發一語。日且夕矣。故事會議。郎署官不入議室。時劉貽哲爲員外郎。遽自外入。衆驚喜。欲借其言以散。皆問曰。君意云何。貽哲極言倭不可封。狀甚悉。公不聽。而富平爲太宰。卽出貽哲於外。爲潞安守。其資已過矣。不知其意以貽哲之言非耶。抑亦知其言是。而第以小臣不可爲負薪之議耶。何不容之以悟石公。嗟乎。石公雖忠。奈何。公忠繇天性。卽軀命不顧。無論聲色貨利。見一才士。卽忘年忘分。極口巽揚。假令爲總憲冢宰。當必有益國家。其如天命何哉。石公諱星。字拱辰。別號東泉。東明縣人。碩偉樂易。母燕。夢星入懷而生。公其歿之夕。天晴忽雷雨。一大星自東北墜地有聲。茂恩母子於柳州親見之。異哉。此豈誤國人耶。而所遭不幸如此。豈非天爲之哉。公生於嘉靖丁酉十二月十五日。卒於萬厯己亥九月七日。享年六十有二。配鄭繼魏。俱先卒。娶高。副室四。曰李袁周何。子二。長茂岐。諸生。娶太學谷永治女。早卒。鄭出。次茂恩。娶長垣按察使邵公永春女。高出。銘曰。

國之所患。臣鮮忠。忠孰逾者。若石公。夷醜相侵。亦厥庸。棄之何遽。損蕃雍。而乃殲我良股肱。當日公與穆考功。臣節友道。古人同。天淵震震。聲名充。孤特陳力。莫爲戎。焦原跼跼。莫爲恫。情苦事乖。何以訟。腐心瀝血。歸幽宮。嗟嗟。天乎。豈夢夢。運丁陽九。天塗窮。攘攘者。惟思其躬。罔養者。吉貞則凶。于肅愍與公而雙。數定賢姦。非所憑。人生誰能爲僇。儻所恨中懷。不得通。嗟嗟。石公乃英雄。知己片石馬鬣封。白楊青草終蒙

龍。

明正議大夫巡撫甯夏都察院右副都御史朱公墓誌銘

朱公以萬厯丙午四月二十九日卒。其子時萬等未得請卹典。而以公門人李進士若珪所爲狀來求志銘於余。余謂朱公有剽逆之功。未宜不救。蓋少俟之。今且三年矣。遂卜以戊申十一月十九日葬公於邑城東祖塋。與元配左安人暨側室王孺人合葬。遵遺命也。按狀。公名正色。字應明。別號和陽。其先山西榆次人。永樂中有名伯瞻者。遷南和。生榮。榮生貴。貴生鉞。鉞生隆。隆生家卿。公父也。以公貴。封兵部車駕司員外郎。公生而夙慧。十二補邑諸生。司理錢公文爵試以春秋義。奇之。拔置郡學。名籍籍趙魏間。十三而學易於吉水張公鵬。十四而學書於歸安茅公坤。十六而學詩於濟南李公攀龍。稱高第弟子。學問淵博。文章瑰異。兼之談兵。擊劍騎射。及於小伎雜術。皆乍聞而得其精。不習而盡其妙。而意氣豁達。愛人喜士。每突猝之際。膽智飆集。應機耦變。有若預設。蓋公幼稱神童。弱冠稱異人。聞者無不仰歎。見者無不傾心焉。辛酉舉於鄉。甲戌成進士。爲偃師令。偃師故有軍七百餘。久遠逃亡過半。上官令有司鉤考。數多者得上薦。有司一切刑毒之。無所得軍。而民益逃去。乃雇貧無賴者從軍。邑始有雇軍錢。民不能供。以逋軍錢告之上官者三十餘人。公下車悉除之。封還所告不問。他晷晷使民皆類此。民繪像歌詠之。上官皆以爲才大。偃師不足割也。上疏調汲縣。命下。曾荊州江陵學青衿擊縣官。主爵者求健令往。旋調之江陵。江陵

權相之鄉也。宮鄰金虎之勢已成。其難萬倍於青衿。公至。以前令蓄縮久。倚勢爲惡者衆。則收其魁宿。如千戶龐清。較尉徐珊。寘之重典。而戍主簿劉堯明。徒巡檢范應瑞等多人。上官欲開釋之。公斷斷不可。然向者自恇怯之過。權相非必無人心。故亦不罪公。頃之權相父死。隨其儔請奪情。而自請急歸治喪。上遣中官往祭。中官頓境上。使人來曰。讀詔必於孔子廟。時上官咸在。錯愕不能置對。皆目公。公向使者言曰。固不必止之。諸生數百人。已聚廟門痛哭。倘有變。無與有司也。使以報。竟不敢至孔子廟。而之他所。時中官緹騎冠蓋會葬者屬至。公紆徐應之。閭閻不擾。創議催科之法。隱親精審。上下稱善。勒石垂後。仍班全楚通行之。待青衿肅而有恩。政暇爲之談道講藝。疊疊不倦。士皆父師事之。權相心重公。而以其自疏。不大用。戊寅轉南兵部車駕司主事。掌船政。卽條議革弊數事以奏。權相終欲招致公門下。庚辰轉北車駕司員外。無何。懸吏部缺餌之。公若罔聞也。求使甯夏。以歸侍養兩尊人。俄遭內艱。臺省交章薦公。邊才異等。服闋補武庫司員外郎。陞僉事。備兵肅州。肅州古月氏地。中國之絕境也。邊事習於欺玩。人不知兵。公汰簡訓練。示以百二陣圖。飛棍攢牌等法。軍容改觀。直指閱兵祁連山下。嗟賞不已。曰。孫吳何加焉。是時其將朶剌軍士積怒。約日爲變。投瓦刺。公傳諭如爲變者以身當之。軍士復書諸通衢曰。不敢累朱公也。遂窘辱其將。叩頭痛哭。罷之。公收其唱亂者二人正法。公每聞警。輒擐甲胄。上馬親督戰。不自以爲文吏。調度受功而已。故將士之氣百倍。會婦切盡比吉。圍金佛。公提兵出禦之。遂遁去。奏聞。上嘉其任事。令司

功紀之。自是敵不敢內釁。戊子。陞副使。備兵甘州。甘州去肅州四百餘里耳。甘肅於九邊稱一焉。公威名素著。中外畏服。時軍士亦苦其將。會大閱。共起爲變。刺刃直指之。僉從。諸公皆羸服投民家。公獨挺身出。撫誅首惡。莫天敖等十二人。餘皆縱之。因強直指行大閱事。衆嘆然遂定。甘肅非朱公。卽成甯夏之變。未幾。順義王假道迎佛。止牧石硤口。將入犯。軍士沿邊戍守。天寒雨雪。多死者。公歎曰。安有士如此。而望其禦敵者乎。卽撤之。下令優恤。而指示要害屯守。敵果突入水泉堡。我兵邀擊。大破之。厥後順義王過塞上。率衆數十萬。竟不敢動。公在甘肅九年。至壬辰二月。而有甯夏之變。先是當事者刻礮失衆心。哮承恩劉東陽等乘之。唱亂。遂反。而詭言承恩等實無意反。爲軍士所迫耳。督軍者信而欲降之。久之知其詐。乃進兵。然不能神速。哮故降虜也。乃括金帛子女。啗著力兔等入援。而以花馬池等處許之。承恩遂改服。與著力兔合。四月中。乃推公爲僉都御史。撫甯夏。公被命。卽日匹馬渡河。曰。湯湯乎。賊在此矣。至則以水攻方略。陳之本兵。石公。石公疏上。上下其議。便宜行之。蓋甯夏北倚賀蘭山。其三面皆黃河。決河灌甯夏城。則哮與著勢不得合。而同事者以意見相拄。不聽。至八月初。有旨切責。乃主水攻之策。敵入李綱張亮等堡。公提兵破之。斬馘甚多。賊橐孤城中。河水且入。窘甚。聽俠士周國柱反間相屠。求自贖。公領將士數人登城。賊蒼黃不知所爲。持兵自捍。公手刃數賊。乃皆稽首崩角。請降。下令貫其脇。縛渠魁獻之。闕下。甯夏遂平。以功陞副都御史。旣而敵乘我空虛。住牧刀槍等堡。欲內犯。公密授將吏方略。廣武搗巢。獲首功百。

七十餘。先是甯夏殘破之後。公問瘡痍。贍饑虛。蠹虐士敵。又遭大創。不敢來。自是甯夏得以休養生息矣。然同事者不無生忌。竟使人撻舄害之。勘非實。僅予致仕。公歸以得養太公。不勝喜。太公歿。得躬親殮斂。如先安人。免終天之恨。殆亦天之所助焉。公讀書課子。後進從之請業者甚衆。暇則清娛雅歌。浩然甚樂也。緒已都忘甯夏之功。無論升沈訾譽。少宰楊公時喬。正人也。曾首薦之。然公所與往來者。惟林下人。絕不通時貴。故終不用。公生於嘉靖己亥正月二十九日。得年六十有八。元配左氏。封安人。側室王氏。皆有宜家之德。相夫之才。先卒。子時萬。錦衣千戶。趙子曰。今之稱邊才者。大都以邊吏爲捷徑。鮮實效。若朱公可謂質有其文。武者矣。當權相煽威。久居其邑。身與名兩得。此其智謀元遠矣。甯夏蕩平時。余正在長安。所親見。天子坐樓上。百官朝服侍立獻俘。人人呼萬歲。功在社稷如是。豈其垂歿而國家快然置之不問乎。公道諒不終晦。然公之功不朽矣。銘曰。

二儀神氣。誕爲英雄。允文允武。如虎如龍。生匪其辰。妖倖是崇。衆所憚往。則公是庸。若商邱開。蹈火可從。彊梁不悔。慙腸見容。人旣投艱。禍亦數逢。天若爲之。以明折衝。暇日濡毫。臨陣飛縱。摧驕鏖亂。以克成功。功之未成。鮮不樂凶。功旣成矣。妬口興戎。公也讎賊。彼實讎忠。幸而有身。棄若枯蓬。不知其存。不知其終。有墳鬱鬱。南和之東。歆景騰光。飲日歆虹。千萬斯年。曰維朱公。

明太常少卿王公墓誌銘

王公以萬厯甲午正月二十三日卒。公有子循則殤。以其兩兄之子循繩循式爲後。皆幼。今二子皆冠有子。循式爲諸生矣。乃卜於城西五里許。以今年十月二日葬公。公壻諸生靳撰爲狀。求余爲銘。余讀其狀。潸然以泣也。余與公弱冠相愛。公逝矣。非余孰銘。公兩爲邑。邑之人迄今祠祀之。余曾見興化碑。想已遺落。靳生能文。然弗知其悉。奈何。可不悲哉。公名三餘。字勤甫。別號成所。其先不可考。永樂中有名德者。自小興州來安平黃城里。生文英。文英生宗仁。宗仁生三老。三老生珪。珪生讓。讓生質。質生公。父遜。有文行。以歲貢爲葉縣訓導。娶李太孺人。生三恪。三壽。及公。公生九歲。而訓導公卒於官。公生而白皙。眉目如畫。神氣清朗。太孺人愛之。庶幾能成父之志。然孤露貧窶。不能延師。亦不忍苦之。時崔戶部爲諸生都授。令從學焉。戶部公姪壻也。書館童子。率乘師出。博戲笑謔。或跳踉擲。登樹跨垣。公據案誦習。若弗聞見。以故倫輩多被扑謫。公獨爲師所器重。十四而補諸生。名聲日起。青衿推服。學使者陳公試第一。乃聚名生於恆山書院會文。聘平江艾先生。邵武謝先生師之。余與公皆與焉。二十一而舉於鄉。甲戌成進士。授蘭陽令。余夙知公溫仁。慮其以寬致慢也。爲文以箴之。明年。余爲汝南司理。特過蘭陽。覘其政。士民訴訴如也。井里宴宴如也。寺舍肅肅如也。麻麥桑柘。幪幪蓊蓊如也。則知公之材術甚高。而第以溫仁爲質耳。蘭陽小邑也。地瘠而賦重。公爲之請於上官。減數千金。嘗郊行。有回風在其前。若嚮若導。公心動。密求之。果有殺人而瘞其處者。一問伏罪。遠邇稱神明。丙子調興化。興化苦水多。逋賦。公以寬仁治之。如蘭陽。甚得

衆心惟恐賦之不完。以爲公累。歲嘗饑。公不請而輒開倉賑給。全活者甚衆。上官皆以爲賢。庚辰徵入禮垣。時楚相擅朝。言官多出其門。弄權醜正。公不抗不隨。克全名譽。而其最爲士林所稱者。在薦趙司徒。趙司徒。楚相所舉士也。爲南都兵曹。上封事。言楚相之子倖得科第。陽城王太宰出司徒爲左官。無何大察。遂罷之。楚相死。公疏薦起家禮曹。今爲司徒。朝論美之。公在省垣十餘年。至吏垣都諫。乙酉主山東秋試。稱得人。庚寅陞太常寺少卿。公念太孺人老矣。移疾歸里。爲園於邑西之近郭。時御太孺人板輿。林游池酌。起舞上壽。以其暇日。與來學諸生談道講藝。殊有以自樂。無復仕進之情。居久之。太孺人卒。公以哀戚之過。遂病嘔血。勉強襄事。逾年亦卒。大吳之孝。不克免制。慟哉。公明敏好問。國家之遺儀軌事。無不明解。練習。如指諸掌。其才識非人所及。而平粹和厚。不爲崖異。智愚莫不樂之。安平地斥鹵可養鹽。而商鹽至。有司輒使民貴買之。大不便。公白之直指。闕商鹽。而令土人納稅如其數。公家居重見有司。而以邑之利害請問者。無不精爲陳說。較若列眉。大指要在爲邑人建利除害。公之卒。人人悼心流泣。歎聲動地。公生於嘉靖庚戌十月初五日。享年四十有五。娶楊孺人。定州楊公瑄之女也。生循則。女二。長卽斬生妻。次適深州杜長史誥之子樹標。循繩循式各一子。循繩一女。皆幼。銘曰。

公歿如昨。而十三年。宅於茲城。且百且千。山水孔嘉。仁彥所躋。雅文明詩。恭也克傳。暗醺幾何。何促何延。明山西右布政使王君墓誌銘

王君名述古字信甫。別號鍾嵩。開封禹州人也。其先洪洞人。有名善者。始徙居禹。以鄉舉爲平陽府通判。三傳至引禮公懷義。娶許生六子。其二爲禹州公。名納誨。配郭安人。生九子。其六爲信甫。修幹皙顏。風骨秀挺。十五爲諸生。二十五舉於鄉。明年成進士。試宰富陽。調崇德。以崇德劇也。信甫才高氣銳。事至立決。而務爲簡易便民。折獄用經義。宿猾大豪無敢犯者。其輩既不譽。又不能徇上官之意。結朝貴之知。以是僅轉戶部主事。奉郭安人憂。戊戌外計。忌者未眵也。仍以崇德調簡。而不暇顧。其轉官在乙未計後。非應察數主爵者亦苦於圖說。服闋補內邱。尋轉刑部主事。時沈大學一貫爲首相。而次相歸德沈公鯉。與禮部侍郎郭公正域皆正人相善。會劉御史九經劾其黨二人。語侵一貫。疑郭公使之除己而升次相。方聚謀藴之。而楚宗有奏楚王爲假王者。於是給事中姚文蔚、楊應文、錢夢皋、御史康丕揚、李培等遂謂楚宗之來皆郭公使之。以郭公江夏人知其審。而楚王徧賂諸要人。悉爲盡力攻郭公。郭公引病去。守凍楊村。奏下刑部。時尙書爲蕭大亨謂信甫此事須根究主使之。人信甫知其意。卽問楚宗誰主使。汝來者曰。楚王之外皆主使者。自爲楚藩雪恥耳。信甫曰。此出上疏者之口無可疑。卽援筆書案。行勘楚中。無何而妖書之獄起。妖書者不知何人所爲。其中言上無立東宮意。爲一貫等所強。兵部尙書王世揚等與司禮監陳矩共謀廢立。一夜而散之宮。監九卿之門。於是諸臣各上疏請捕罪人。上大怒。下刑部議。懸百戶爵捕之一貫。復擬旨切責。以爲賞輕。大亨不知所爲。忽有荆門里居同知胡化有深怨於其州官阮明卿等。上

疏言妖書乃其所爲。公胡化與郭公同舉於鄉。錢夢皋遂上疏。直言妖書出正域手。沈鯉乃亂臣賊子。實與同謀。大亨密謂信甫曰。郭公以楚事怨政府。時乘女轎來歸德宅。妖書乃其所作無疑。政府親與余言。必甘心於彼。切不可爲外人言也。信甫曰。如此則爲羅織。分宜江陵之事。豈不可鑒。大亨嘿然曰。彼自爲之。何名羅織。是時康丕揚方巡城。與提督陳汝忠等。叩虛造景。妄捕人。至逮及名僧達觀。冀萬一有妄引二公者。而郭公之家奴。無男婦少長。皆被械繫。其掠治出五毒之外。竟無所得。大亨仍欲胡化之屈服也。信甫乃請其親鞠之。信甫持牘上揖曰。今日之事。所關甚重大。不獨衆皆睹聞。鬼神實式臨之。卽呼胡化問曰。錢給事中疏。謂妖書是郭明龍與爾所爲。何乃誣害他人。化叩頭大叫。痛哭曰。刑部尙書。全不讀律。我自爲阮明卿殺我一家。特來籲天。乃欲我殺郭明龍一家。彼雖同年。自彼成進士後。二十年音驛不通。何得同作妖書。又問郭常來歸德宅。相與竄謀。爾知否。化曰。我知誰爲歸德。公等但爲蜀犬殺人媚人。卽見皇上。斷胡化之頭。亦如此說。大亨慙且怒。輒起。信甫曰。此須以刑拷之。大亨曰。彼佯狂耳。遽退。化所云蜀犬者。斥錢夢皋也。信甫卽具爰書曰。有易我一字者。卽引姦黨出入人罪。罪亦如之。律陳訴耳。疏入上。曰。朕固知其皆僞也。罷之。諸人竟爲信甫所挫。窮鋒盡鏑。無所中。楚中勘疏至。又與郭公無涉。而妖書事未結。竟不得已。聊坐之。皦生光。皦生光固多罪惡。然未至此。乃一貫復請旨。詳鞠之。康丕揚遂上疏。訟皦生光之冤。展數日而賊可授首。蓋指歸德江夏也。上大怒。謂丕揚阿庇反賊。罷其官。一貫力救之。以免。

及考問。讞生光曰。汝認得郭侍郎否。生光曰。妖書是我爲之耳。萬死無辭。奈何欲我奉沈相意。妄害正人。蓋楚事之勘疏至三月。而讞生光正刑。大獄乃絕。康丕揚持斧按淮揚。乃覆楚疏。當此時。非信甫一時善類之禍。殆不知所底止。世之所貴於權要者。爲言出莫違。可以報恩讎。而豁胸臆也。乃冷曹中有如信甫者。枝柱其間。使上不得愉快。下愧於無功。則無爲貴權要矣。豈惟若人恨之。自非忠賢。未有能容之者。信甫五日再遷官。出守常州。無何。劉元珍。喬應甲等。皆論一貫去邪黨。迸散。然無能明信甫之功者。辛亥內察。仍欲以把持堂官處之。或曰。是適令其名高耳。不果。一貫用金鉅萬。竟得中旨。勒歸德去。常州舊守歐陽宜諸。有道人。也。復得信甫往。吏民皆愛戴信服之。其試士。一以文藝爲據。卽郡中賢者。平生所厚善。無委曲。或以爲矯枉之過。然吳中士大夫多。稍委曲。卽無以間執口實。寒微之士。無望甄收矣。其初猶有怨言。旣而咸服之。樹碑以紀其事。尙衣大璫過郡。毫無饋遺。璫語直指。欲愬之朝。直指令二府勸之。信甫曰。幸謝按君。守瘞。不能爲媚也。不三年。奉禹川公憂。服闋。補保定。則爲楊忠愍建祠廟。明年擢陽和兵備。正當北虜卜失兔請封之時。卜失兔者。初封順義王。俺答之玄孫。素囊之孫也。俺答之妻封忠順夫人。所謂三娘子者也。通文習事。而能尊中國。蒸於俺答之孫子。至擢力艮。昏愚淫醫。忠順主番漢之事。然老矣。卜失兔年少。繇薄。而五路台吉最強。時擢力艮物故一年餘矣。忠順不能嫠居。而慙於素囊。難發口。當事者重賄五路主婚封。所費已大萬。信甫曰。從來邊事之壞。皆坐柔媚。若積習不破。封事必不成。當事者笑之。

此語聽之佳耳。顧必不可行。遂與他人謀賄五路。五路乃益橫。求索益多。第言主婚而不封事。至欲與卜會內訌。當事者乃稍與信甫謀。信甫具言今日之事。殊亦易曉。忠順不能不婚也。卜會不能自封也。俺會及各部落。不能一日不仰給中國也。此其權在我。何至以封爵金綬予人。而懼其不受乎。且戎狄無厭。而諸亡命每誑誘之。武弁之黠者。又恐喝我以外市。賄一日不斷。則封一日不成。當事者意頗開悟。而諸夷已驕不可制。於是以撫賞委之信甫。賞試之。信甫與文武吏約。是自有舊例。分外增一毫釐者。必加如律。諸夷唯唯聽命。無敢譁者。頃之五路諸酋擁卜會至帳下婚焉。卜會聽左右遣使數百人橫索新王賞。五路以主婚首功求厚賞。甚咆哮。至欲加賞其子女。信甫一切不動。酋計詘久之。來講封。而忠順物故。數月。諸酋叩闕請封。遵忠順之遺言也。而當事者未卽上聞。卜會以素囊竊其內實。遂去。在事者恐封事壞。終當賄五路耳。信甫曰。今冬月草枯。賄之亦必不來。況此事必不可爲。乃以去就爭之。明年夏。虜果來。封事告成。先是代王妃無子。二子皆庶出。其長者立爲世子久矣。妃故代王以所愛妾生次子者。請爲妃而易世子。先使優人葉美賄一貫等。而後上疏。疏入報可。六年而朝議蠱起。禮部下其事於撫按勘議。開府汪公道亦以代王爲是。疏已發矣。見信甫語及之。信甫曰。公誤矣。汪公駭曰。君何所見之異也。信甫曰。宗藩條例。親郡王之子。有嫡立嫡。無嫡立長。汪公曰。代王之妾。已立爲嫡矣。曰。王妃故。例不得選繼。亦不得進妾爲妃。何嫡焉。汪公曰。易世子已有俞旨。奈何。曰。嘉靖中秦府永壽王之事正如此。旣而仍立庶長。簡條

例視之。汪公不勝喜曰。我本無小人之心。而爲人所誤。今日得聞正論。是鬼神佑我也。使人追還其疏。易之以上。竟得改正。信甫三年考最。汪公疏中。具言代藩之事。信甫首倡公論。扶持綱常。君子以爲汪公不欺。異乎伯宗梁山之對矣。信甫識力絕人。而勤學好問。前代本朝之故實。天下之人物。九邊之情形。悉載於心。遇事輒有定畫。屹不可捫。其試宰時。人皆謂其宜在臺省。而僅得刑部。假令爲臺省。當妖書楚事起時。不過一再疏爭之。必不得。乃以事在所司。竟能救正人於虎口之中。此第一大功。封虜次之。然中國於是始尊。非特所省費三萬餘而已。初。卜曾之叔。黃台吉之庶子。明暗台吉。盡忠順。欲得婚封。前當事者且許之。虜中聞代藩之事。曰。廢嫡立庶。漢法所不許也。遂止。信甫一言。而使夷狄之有綱常。豈小功也哉。汪公而外。孰有能明之者。封事成。有旨陞巡撫矣。而主爵不推也。信甫在朝在邊。所遇皆大節。自下拂上。以獨拗衆。焦唇乾噉。而僅得之。極苦。又元覽博搜。爲易律歷三筌四書屑考若干卷。不無勞神之過。竟卒於陽和。時丁巳五月之二十六日也。距其生嘉靖甲子二月二十五日。年五十有四耳。孤。佶上疏陳情。部覆贈官。予三代誥命。元配朱氏封孺人。贈安人。又贈夫人。繼袁氏封安人。又繼董氏封夫人。一子卽佶。太學生。娶連文學得第女。女一。許字知州連得意子而殤。俱朱出。佶卜以戊午冬十月。將葬於板橋之新阡。以高存之。及信甫弟維則所述狀。乞銘於余。蓋信甫兄弟與存之。皆從余游時所目爲黨人。而力擠之者也。余病。今年庚申。乃爲之銘曰。

河無砥柱。四海洑瀾。朝無直臣。義類胥殘。佞之見忠。勢在必刪。一虎羣從。瞋目嚙。挺身蔽翼。以脫於患。貫索竟虛。鵠鳥爲鸞。不畏王人。御敵非難。威信服之。疆圉以安。異哉若儔。何心之覆。曼云效忠。曼云有德。邊功上最。帝命甄錄。而若罔聞。而惟謠誅。翦伐貞柯。留彼脆木。天亦不贊。賢人不祿。世之杌矣。憂俾我獨道之晦矣。信史誰屬。勒此片石。永垂臣鵠。

明光祿寺少卿馮元靖墓誌銘

今上欽明寬簡。侔德堯舜。冲年踐阼。江陵擅權。既而天去之疾。用賢圖治。幾臻上理。執政者弗便也。漸售其惑術。以私爲權。除不附己者。而佯救之。以卸過。公論不容。皆被惡名去。太倉之負恩遇尤甚。上遂厭薄臣下。以無人。貶黜相繼。不復用。羣司幾盡。執政具員耳。封事一切不報。二三見臺省。恆誅其所不悅。勢不得復留。輒去。於是大臣拱手唯阿。惟其所欲爲。丁巳內察。名士皆不得免。馮元靖其哀然者也。元靖名上知。獲嘉人也。世爲顯族。祖一泉公。父司訓公。皆有才學。剛心疾惡。一泉公爲諸生。得罪邑令。被斥。司訓公竟不得鄉舉。詳具余所爲。司訓公墓志中。元靖生而神氣英爽。孩提時。一泉公偶有所督過。司訓公。元靖之姑母。謂之曰。卽而祖撻若父母。奈何。元靖應聲曰。皆代之。一泉公聞之喜。忘其所督過也。一泉公猶及見元靖鄉舉。元靖早歲能文。秀蔚超特。爲諸生時。督學王公。乃太倉相之弟。以諸生試義。寄太倉。太倉使問之曰。馮生甚奇。何不首乎。督學復曰。固知之。恐其年少易驕耳。及成進士。見太倉。具道之。笑曰。余鑒不

爽也。試爲安肅令。上官無不一見而敬異之者。士民無不一見而親愛之者。積猾大豪。人人斂戢。與民約。有侵冤者。得非時入告。令與所告俱至。卽訊決之。鄰境有大獄。及累年不結者。上官悉以下安肅。訟者固願之。安肅庶得覩白日。又無淹繫。無彊禦之枉撓。吏卒之求索也。泉布之輸於郡中者。胥吏勒取增羨。以爲常。至安肅獨否。邑極衝。又近京城。多驕貴。絕不以廚傳稱過賓。有御史陳姓者。其子應秋試。用馬太多。裁之。畿輔吏治行。無先元靖者。考最後。陞戶部主事。無何調兵部。丁酉使典楚試。俄而調吏部。往時分較者所取士。主司不敢動。以其人當爲臺省故。元靖乃一一閱其文。或否。則求諸擯落者。以是號得人。試畢。燕鹿鳴矣。而直指趙文炳私譏之。文炳宵人也。起家鄉舉。恆恐人輕之。而元靖又新吏部。其視之無非輕己者。文炳曾劾蔣吏部時馨。削籍甚當。而時馨善結納。多稱冤者。富平孫太宰老而愎。極力救之。不能拔。文炳懼。遂上疏。以劾時馨非臣之意。乃爲兵部侍郎沈思孝等所誤。以此求見容。至是向元靖言。蔣公君子也。余劾之。悔甚。元靖曰。何所聞而劾。何所見而悔。文炳既不勝愧恨。而是時同年麻城游令。吏部已擬臺省矣。文炳欲敗之。示風力。元靖適語及之。甫去。則飛章言元靖枉道出麻城。受游令二百金。爲作說客。元靖抗疏。得旨並勘。而文炳倖同儕爲言。直指與所劾並勘。傷憲體。乃釋文炳。及勘者具言麻城非枉道受賄。事無據。明白矣。而吏部猶覆調南京。元靖家居。遭司訓公之變。服闋而起。南工部陞戶部郎中。求使事歸。而遭母張太安人之變。皆得盡其誠信。庚戌服闋。起北戶部郎中。時宮殿爲孽火所燒。正陽門樓又

災。元靖上疏言。陛下聽小人之言。鑿山權市。貂璫四出。發天地之藏。侵細民之利。悉歸於御府。使海內竭涸。億兆咨嗟。加之饑饉薦臻。流冗翳路。其壯狡者悉聚而爲盜。又九邊軍餉。不以時給。恆至虧減。而山西三鎮三年之間。負欠至八十萬。此皆執戟挾弩。易於作亂。今兵食旣如此矣。一旦內外交亂。朝士中孰爲伐謀折衝者乎。城門一閉。臣不能爲陛下計矣。疏入不報。時臺省氣甚張。直欲令人匿景遠避。見之當垂頭結舌。無論不敢撓之。卽言及國家事。如蔡翰林毅中。沈比部應奎。皆爲狂妄。立去之。元靖乃昂昂樞樞。以人倫清議爲己任。吏部諸君。數以人物訪之。輒直言其所知。李道甫司徒。忽爲臺省所攻。卽署有佐之者。顧叔時上書當道救之。舊太宰密以問元靖。元靖曰。此亦易知。第觀其攻之者與救之者爲何人耳。其輩愈益切齒。而元靖陸光祿少卿。遂嗾南科齟之。爲內察張本。然其輩視天下無可畏。不復隲謀。彼已氏丙辰出使過家。卽言元靖及章元禮等。禹州王信甫及其弟維則。皆朋黨。遠近共聞之矣。元靖忠孝天植。其視人決無可爲惡之理。其視人之爲惡。決無可容之理。而其疏融之識。恢卓之才。直往不懼之勇。真足以爲善。安肅之政。百城寡二。而御史陳姓者。以私憾尼之。不使入臺省。俾爲吏部。必有可觀。而趙文炳。饒之淹抑幾二十年。纔轉一光祿。而遂中以吏議。元靖轉官時。卽求出使家居。與其弟元獻子穉仁。繙經談藝。爲老焉之計。而羣小猶恐其出也。竟借內察以處元靖等諸人。而禹州兄弟皆橫被口語。元靖平生素壯。一病竟不起。善類咸痛恨之。元靖生於嘉靖己未十二月九日。卒於萬曆丁巳十一月十二日。年五

十九耳。娶宋安人。先卒。子一兆麟。卽穉仁。廩生。娶都御司劉易從女。繼娶千戶錢紹賀女。女一。適生員王濬德。孫一伯鼎。聘經歷郭磐女。劉出。元獻與穉仁卜以戊午之十月。與宋安人合葬於司訓公之側。穉仁持元獻之所爲狀。來屬趙子爲銘。時趙子病未能也。今年庚申。趙子復起。方元靖之卒也。外人皆曰以貶官而鬱鬱。元獻曰。余兄殊不以官爲意。趙子曰。昔仲尼去魯。作雉噫之歌。不鬱鬱耶。豈以司寇哉。余丙辰冬而病。明年春而聞元靖之貶也。而又聞其死也。五內剝裂。以至於今年而復起。若小人者。皆能使人鬱鬱而死。則君子無類矣。彼揚揚而死者。豈少哉。猶萬萬笑而被格矣。豈足道哉。元靖歿未幾。而建會入犯。破城隕帥。辱國不可忍言。朝士中不聞有老謀壯事。竟如元靖所云。銘曰。嗟吁昔賢。未見此時。白日晦盲。市有舞鷗。眇未曾臣。太阿是持。貨之專魯。詎足爲譽。願忠則讎。懷才則譏。矧惟若人。倜儻瑰琦。蚺惡龍文。雞駭鳳姿。力能相扼。豈容奮飛。百里之外。長駕莫施。蹀躞僂僂。及不及衰。子孝且才。獨漉同悲。賢良俱盡。國步阽危。強敵憑陵。曰將宋之。孰念憂辱。先是孰思。燕趙之間。乃生窮奇。如將大車。祇自塵兮。吾其左衽。云胡不歎。幸而未死。攄憤勒詞。玄靈杳茫。黃壤有知。

明敕贈儒林郎右春坊右贊善李公暨元配袁太安人墓誌銘

今上聰明仁孝。得之性成。而遜志務學。承二聖薦崩之後。沖齡嗣服。永言追慕。推恩臣下。咸得榮其父母。而於講幄之臣。尤爲篤厚。於是李汝立奉袁太安人之諱。上疏求歸。上若曰。茲惟朕朝夕論思之臣。其乘

傳以歸。將之金幣。其母應有卹典。禮部擬例以請。故事。講讀官四品。乃得祭其父母。時汝立爲贊善。纔六品。禮部未有以覆也。汝立抵舍。復上疏曰。臣頃以臣母見背。具疏上聞。蒙被特恩。及於臣母。其時違離闕庭。切劓荒迷。俛俛而歸。今喘息稍定。伏念臣父生臣甚晚。教之習經。甫爲青衿。而卽見背。今二十六年。臣以章句豎儒。遭際聖明。蒙格外之殊恩。及於臣母。已爲過望。但念臣父與母。以衾穴之同。喪紀懸絕。恐臣母之心。亦有所不安者。臣反復躊躇。自以經術膚淺。濫塵講幄。曾無能裨益聖學之萬一。何敢陳乞。無厭。惟是仰見皇上體悉臣子。無所不至。如霖雨之潤黍苗。自葉流根。用敢冒昧以請。倘臣父得併蒙卹典。臣烏鳥之私。意望滿足。惟誓與子孫永圖結草之報。上下其疏。禮部議曰。陛下隆學崇孝。用古帝王敬父子悅之意。母旣因子以沾恩。父得偕母而議卹。並祭雖有成例。而曠典難以例拘。上報曰。可。於是命中書撰文。戶禮部檄府縣具牲醴庶羞。如大官法。遣太守致祭。詞美而儀盛。肅肅乎煌煌乎。君臣之誼旣篤。幽明之情允洽。汝立乃卜以今年十二月三日合葬。先是李公之墓。未有銘也。以屬於余。蓋李公余大母之姪也。又與先館陶公爲婚姻。汝立之弟國任。則余妹壻也。宜莫若余知李公與袁太安人者。李公名五倫。字慎之。別號北濱。其先世有名福者。自山西長子而徙於高邑。生海。海生伍。伍生舉。舉九歲爲府學諸生。生瑜。爲縣諸生。娶張生子三。公仲也。幼而秀骨清顏。以奇童稱。十二爲諸生。爲文深醇爾雅。每督學較士。輒冠衆。皆預知之。每大比。衆皆以爲必舉。然卒不見收。益肆力於學。泛觀博涉。能爲古文辭。諸生從遊者甚

衆其貧者皆館粢之多爲名士公事父以孝稱痛母蚤世孺慕終身以祿不逮親爲恨其待兄弟有薛包之讓高才潔行時論推抑而惻惻然無上人之意以是所至人敬悅之劉公沐賢令也延之教其子甚加禮重趙州秦姓者有人命之獄求公控解約以金珠等物爲謝公峻拒之然劉公固心知其枉與公宴飲語及之或私告秦復來加謝欲公從與之公笑曰昨劉公已言之矣豈遽也哉勿徒多費爲也卒不受秦竟得釋公十一試於秋闈竟以歲貢起家先是歲貢者邑令率爲醵金於養馬之家養馬者病之至公獨不受後遂爲例謁選得河間府訓導河間士待學師故薄以公淡泊無求更親戴之太守燕公修火神廟成屬記於教諭教諭私求公代之燕公大加稱賞教諭具言實李公所爲遂延公至與語大奇之自是聲名日高臺使者再薦擢國子學錄值戊子鄉試大司城較選諸生可入闈者屬屬吏分閱公取王衡第一張文柱次之及榜出如所取都下傳服之二載轉南陽府通判時進士諸壽賢以抗疏言事謫府學教授公賓接之甚相善也署新野篆滌舊政之垢濁徵收甚平積羨千金悉以貯庫還郡之日老幼焚香遮送之寶豐令號爲無害而直指不悅欲鐫之授意於公託以有所鉤考至縣構其過爲口實公報以無所聞竟以此失直指意疏論調簡得萊州府署卽墨篆值大饑惻怛賑救食不能餐所全活甚衆大爲趙太宰所知以繼母憂去郡除服復補東昌僅八月而病卒於官無以殮太守王公命爵檄諸屬賻之乃能歸居官十餘年而古宅先疇無所增益公配袁太安人惟舉一女久無子勸公娶趙安人五十外乃生汝立

猶見其爲諸生。身後竟被寵榮。袁太安人者。邑處士袁公華之女也。治家勤儉而嚴。皆出天性。公游宦。太安人惟在家督臧獲耕織。視汝立兄弟。不啻己出。親屬有私乞者。曰。吾家故非雄於貲者。又不濶於官。吾不量而施。兒女輩何以餬口乎。自李公歿後。憐諸子皆幼。教之不忍用嚴。而恩勤所感。無不競奮者。汝立成進士。爲翰林。以秩滿及覃恩。贈公如其官。母封太安人。生母趙封安人。太安人乃大喜。然勤儉如昔。李公田宅。皆在東村。自汝立第後。乃於城中置宅。欲以逸太安人。太安人弗樂也。曰。是不便督作。將使田園荒蕪。汝立以鮮衣進。一再衣。卽褚之。曰。此安坐無事者所服。吾不能也。雖公父文伯之母。何以加焉。儒者見爲善未必得福。遂謂天道之報施。有合與否。世之爲善者少。而爲惡者不啻多人。之情所好恆見其不合。所惡恆忘其爲合。今觀李公袁太安人之事。一何奇也。爲善之報。豈不厚哉。李公生於嘉靖壬辰七月二十三日。卒於萬曆丁酉十月二十一日。得壽六十有六。太安人生於嘉靖甲午十二月七日。卒於天啓辛酉三月四日。得壽八十有八。子三。長標。卽汝立。娶處士胡公仲清女。封安人。次核。汝實。業儒未成。然讀書能詞翰。余嘗爲詩以贈之。娶邑吏目郭公九錫女。董出。次柱。卽國任。娶余妹者也。文采已成。今爲選貢生。女四。適柏鄉鎮撫趙時元者。太安人出也。適臨城武生劉應昌者。董出。適趙州廩生王詢者。趙出也。不幸早寡。守節撫孤。適柏鄉庠生趙攀勝者。亦董出。孫男三。士劭。邑庠生。聘柏鄉太學生趙攀鳳女。士勃。聘甯晉太學生王獻可女。核出。士勉。聘甯晉馮御史英女。核出。標嗣。孫女三。一適柏鄉魏御史純粹男庠生。

杏祥標出一適趙州庠生蘇勸男將蕃核出一許聘趙州掾張蘊男柱出銘曰
公之淵學藻陸其文困於桎棘歿稱詞臣公之穆行允爲世珍仕宦坎壈昌於後人後人之昌曰惟吉嬪
志在垂裕不私其身克生令子論道紫宸福備而終卹典豐殷問誰祭者太守動輪二靈永勒汪哉主恩
事繇特起匪舊於因陰關出日枯草回春何以報之國步斯頻哀籲蒼顙求助媼神

明故文林郎禮科給事中翼野曹公暨配朱孺人合葬墓誌銘

余所賢於海內之士大夫曹公其最也曹公令山陽時余親賈太學應元爲主簿公問余無它耶迨余以
考功得罪違署公爲禮科給事中疏薦之此時新建爲相擬旨謂余貪臺皆嘗言之何得濫舉降曹公柳
州府經歷己亥朱君敬循筦京察遂罷其官夫臺省誰云余貪者口代天言而可以臆造也朱君助桀爲
虐而又甚焉誰能不懼曹公里居久之余乃謝以一書竟未得見也乃曹公遂卒蓋癸丑之八月二十一
日也縣懷時語其子調甫等以志銘屬余公配朱孺人病殯殮調甫侍醫藥未索也乙卯五月五日朱孺
人亦卒今年丙辰四月調甫以兩大人狀來相見不勝其悲調甫楚名士溫文而篤誠肅括而博大余見
之如見曹公焉曹公名大成字元和別號翼野其先滇人也名子智者始徙江陵高祖遠曾祖琇祖炳生
文斗是惟嶽麓公有軼才老於明經嶽麓公繼娶徐生四男子公最少生時有異夢爰自髫年姿度英偉
嶽麓公嘗曰此必大吾族惜吾老不能見也十一而父見背痛先志之未就念孀母之食貧茹荼集蓼殫

精典學十八爲諸生。卽挺挺楚材中。達人鉅卿見之。無不器異。南樂魏懋忠司馬。其時爲荊州府司理。延之西館。與其子道冲爲文字之友。道冲今爲太史者也。他同學者大抵皆通顯。公猶然青衿也。至己卯。謂文采已成矣。何有於一第。乃又不利。家貧。母春秋高。恐一旦不可諱。將抱恨無窮。愈益發憤。無寒暑晝夜。色槁髮落。至壬午而舉於鄉。明年春試又不利。至丙戌乃成進士。除淮安府之鹽城令。淮安。宋楚州也。疲而劇。兼之歲荒。公捐金賑廩。親至諸鄉鄙。就予之。不贅聚也。又爲饘待餓者。恆忘食事。面目黧鰲。母見之。歡曰。爾之瘁。民之澤也。此時米價翔貴。鹽賤。公出帑金平之。竈丁免於逃亡。貧民拾稻於輿化者。其尉悉誣爲盜劫人。欲以邀功。公力爲振理。直指劉公讀其文奏而善之。時給諫常公出領河隄。聞之。檄公董其事。績成。薦之上。賜金十二兩。紀於主爵。邑近海口。范文正公監楚州糧料院。嘗築隄塞之。潰久。潮水嚙民田。公藏謀於衆。海以子午潮。隄成其間。稍遲。則爲澆饋矣。乃具茨柴石槌。及人徒之費者一年許。齋戒約期。夜至其地。邑士民小大畢集。跼蹐無留者。公泥行督畚杵。萬手足並作。譁呼之聲。魚龍震駭。未午而隄成。潮束於漲崖。廣斥皆爲脂稻矣。邑人爲公立生祠曰景范云。主爵者調公山陽。以山陽淮安附郭。爲漕運襟喉。又南北孔道。難治。鹽城士民號泣留之。當道爲上疏。不能得也。山陽煮於鹽城之政。獷者馴。黠者淳矣。是歲以三年考最。贈嶽麓公如其官。母徐封太孺人。配朱孺人。公治山陽。以錢穀多幣。一一持籌而算之。毫釐必悉。刊冊以傳。迄今稱便。其他諸政。大都以祛宿蠹。滌煩苛。休養其民爲主。暇日則進諸生。與

之講藝。不著作人之效。辛卯。分較南都士。甚爲得人。壬辰。計吏舉卓異。其夏被徵。將行。邑丞攝事。謂帑中羨金可七千餘。皆公掙約之所餘。可攜之爲資斧。公怒曰。君何忍涅我。遂白之當道。爲正供焉。是冬。選授工科給事中。無何。以太孺人不能就養。遂請告歸。會其兄秦安令亦解官至。致美承歡。誠所謂一日而三公不易者。明年。太孺人八十。賓客屬至。稱詩載酒。慶萬福。祝千齡者。填益庭戶。鄉邦榮之。明年甲午。太孺人卒。含斂。柳塗。情物俱盡。然一切就禮。不作佛事。隨尙鬼之俗。服闋。補禮科給事中。會宮殿焚於孽火。公有時事可虞。天聽彌高。朝署半空。及輔臣誤國等疏。時東宮久不立。冠婚愆期。公上疏言之。又與省僚四上疏。皆不省。公乃特疏。語益切直。上怒。然竟容之。而會劉給事道亨疏。詆新建。劉固與公同年厚善。新建疑其與謀。而又疏薦余。余之得罪甚深矣。遂貶公官。未幾。以計典錮之。公既罷官。乃作有斐園。徜徉其中。世之貴人。謂天地間可欲者惟官耳。奪之官則當愁死。此以己量人者也。人生適志之塗多矣。嗜之而得其趣。皆足以自樂。而况曹公有道德者乎。曹公好讀書。能詩。能古文。能飲酒。直寄耳。其視軒冕糞土也。此時廢棄甚多。概無所用。曹公竟卒。朱孺人者。遼藩奉國將軍松崖公之女也。松崖公博雅有文。修身教家。以禮娶趙恭人。生孺人。愛之曰。吾欲奇此女。挈令宗女封壻。不得爲京朝官。吾將俟夫乘龍者。久之得曹公。遂許之。于歸時。曹公已爲諸生。徐太孺人在堂。孺人婉順小心。自姑及姒叔。先後皆以爲孝。時脫簪珥。以繼饔飧。躬執爨。絕無驕貴之氣。曹公之鹽城時。孺人侍太孺人舟中。值颶風。大恐。遂病。而松崖公之諱

至號泣不食。幾殆。太孺人爲之禱。竟獲有瘳。及山陽之封。孺人珠冠象服貴矣。憶松崖公乘龍之言。喜極而悲也。孺人善病。慮奉姑勤客之有缺。在山陽。爲曹公卜側室李。及罷官。又卜側室施。待之極有恩禮。視其子爲己子。曹公歿後。孺人愈病。卒時神氣甚足。正如曹公。曹公生於嘉靖乙卯六月廿四日。享年五十有九。孺人生於嘉靖戊午十二月廿四日。享年五十有八。曹公十一子。朱孺人出者四。國梅卽調甫。娶文學劉公震楚女。國揖娶平度州判孟公見魯女。國霖娶御史陸公岷源女。國械娶太常正卿傅公楚築女。俱庠生。李出者四。國樸庠生。娶廉憲楊公景渚女。國標聘宗室季軒女。國樂聘長陽郡王堯亭女。國楓未聘。施出者三。國棠聘松滋郡王震陽女。國棐俱幼。未聘。女一。亦李出。幼孫二。世燾。國楫出。世燧。國械出。孫女八。國楫出五。一聘蘇侍御次公季澍子。一聘傅太常季公飛柱子。餘三幼。國霖出一。聘永年令王君長公執先子。國械國樸各出一。俱幼。昔子夏說芣苢之詩曰。室家和平。則婦人樂有子。以爲關雎之化。曹公之子至十一人。朱孺人皆愛之。十一人者。又皆孝友。曹公歿後。調甫兄弟有室者。以國標等幼。各取而撫之。豈非和平之極哉。曹固神明之裔也。曹公以鼎足之略。赤心爲國家生民。而抑厭於時。其後人必章矣。調甫等以乙卯十月十五日。合葬兩大人於龍陂橋之原。銘曰。

吁嗟曹公。古人勞人。焯掌績學。詘極乃伸。匪祿之榮。有母而貧。再領劇邑。天災我民。煦之嫗之。粲晏斯臻。入爲司直。心焉忼忼。手押浮雲。以昱前星。碎首不辭。數犯雷霆。天帝馮怒。則我肯容。惟彼長者。則不可撓。

匪將大車而塵冥冥。孔貶不已。播之草莽。有媛恂淑。惟儷惟友。仕隱偕樂。其儀克母。鳩子僅七。鳳雛逾九。樊姬進賢。虞邱是師。嗟今之人。豈無鬚眉。爰設諍臣。教之銜枚。蘭則有枯。艾亦有萎。有芳有穢。華色斯須。二靈上陟。子孫永禧。有官君子。視此銘詞。

明正人兵部職方司郎中張公墓誌銘

張公之卒也。余往哭之。不勝痛焉。其子應辰等。以公之門人獲鹿吉令君所爲狀。來求志銘。蓋令君賢者。其求爲狀。乃余意也。張公名主敬。字懋情。別號恆華。滎陽令之子也。生而頤長豐偉。鬚髯早出。少卽不類童子。其舉動言語亦如之。十二墜井中。無知者。久之乃出。人以爲怪。初學易。及滎陽公游成均。乃命之學禮於王先生耳。所暫聞。卽不能忘。兩閱月而悉明解。無何補邑諸生。二十二以禮經首舉於鄉。癸未成進士。爲長治令。長治潞浩穰邑也。俗善商賈。困篋量金珠。厥篋織文貢於天府。衣被四方。公一無所染。卽其地產煤。往者里民輪輸供爨。而邑有供給房。以備令之他出。公下車皆罷之。曰。令不有俸錢乎。何爲其復擾民也。君子曰。舊而沿之。人弗覺也。細而忽之。衆弗怨也。然而張公且弗爲也。夫清身愛民之於張公也。不必言矣。公性方而識融。才高而心虛。勤苦周密。竭節奉公。嘗遇聖壽節。里胥畢集。令各舉上戶。不中者且重治之。衆黥忽出不意。皆以實報。悉知其上戶。厥後審徭役甚平。貧民無累。衆皆大喜。以公之留意於民也。而八諫雄山。距縣遠。公就之。其適均處。慮其勞費。衆又皆大喜。公聽訟。不徇請寄。不避嫌怨。有惡宗

訟平遙民十七人強劫。當成。公廉得其寃。俱開釋之。其平反多此類。公政聲甚著。己丑。大計。當事者舉卓異。而一同年出使過其邑。恨公無所饋遺。薄之。乃造言親見公入計時草奏。欲言其座主典試通私。侵及兩執政。以故不得與徵書。久之。知公賢者。擢工部主事。去之日。老幼空里巷出送。夾潞河而號泣。公旣去。共爲祠祀之。上黨之有生祠自公始。公在工部。管節慎庫清。旣而調兵部。陞員外郎。督捕月賦諸軍牢粟。寮友諱之曰。君食指得無動乎。公不解。徵索之。乃知往者督捕至。武弁卽具盛饌。宥之百金。名曰常例。受之。遂共剝削。而童僕吏卒無不啜汁者。公旣不受餌。其輩計蹇。遂悉賦給。諸軍感悅。都人士稱頌之。癸巳春。陞車駕司郎中。先是。上久不立太子。言者貶黜相屬。至是。忽降御札。欲並封三王。待嫡。當國者遂奉行。之。公上疏言。無嫡立長。三代以來所通行。未聞待嫡之說。且往者羣臣之請立太子也。上一則曰幼弱。二則曰幼弱。及請之不已。一則曰激聒。二則曰激聒。亦未聞有待嫡之說也。敕諭一頒。中宮斯重。豈往者忘情於皇后。而至今始可待耶。輔臣違經悖禮。阿意從欲。希一身之寵榮。萬一危機潛駭。禍及社稷。臣恐輔臣之罪。天不能蓋。地不能載也。疏入不報。然其事亦竟寢。無何而余以管京察忤當國者意。被播。公出餞。賦莫赤匪狐。未幾移病歸。乙未。遭滎陽公之變。哀毀幾於滅性。三年不御葷酒。不入內室。不聽樂。不笑。几榻匕箸。皆從樸素。服闋而不忍釋。禮盡而有餘痛。燕趙之士大夫。語居喪之苦者。未有若張公者也。己亥秋。公除服二年矣。褚太孺人強之北上。曰。吾與若俱。至則補職方。職方主武官爵。以賄賂請託爲常。公性

不受私。絕不與中官往來。執政貽書爲其孫丐優轉。至再三。情詞極懇。公竟不聽。一舉主厚饋遺。公曰。以爲太夫人壽。公謝不敢當。使人尾之。則果爲武弁僧者也。諸大僚鮮不有所託者。皆不效。每以干大司馬。大司馬亦不能奪也。時倭躡朝鮮。國家爲大出師赴援。舊司馬議與倭媾。倭不從。以久暴去。而我師躡未已。朝鮮苦之。議者欲撤兵。舉朝皆慮倭復來。已執其咎。首鼠莫肯決。公獨以爲倭至而救之。中國之仁也。倭旣去。復代之守。無論久戍海外。糧運甚艱。本非中國所宜行也。力主撤。大司馬曰。固也。此事大。固未易任。公曰。誠使國家不爲一身計。亦易任耳。竟撤兵。倭亦不來。歲省餉五十萬。未幾播州酋楊應龍叛。議者或主撫。或主剿。未定。公力主剿。徵兵百餘萬。八路並進。談者多張播酋之兵。若蚩尤項羽。其鋒不可當。而一直指黔人從家來。特疏不可輕用兵。人皆以直指親見播酋之陸梁。又自爲桑梓計。必萬全。宜聽公持之益堅。不兩月而捷書至。夜郎千里。悉爲郡縣。人皆以公之功甚大。仗鉞非遠。會中使權稅遼左者。疏劾大將軍馬林。上用其言罷之。朝論大駭。兵垣侯公先春救疏未報。上怒遼左缺大將。何不亟推補。公遂削籍。出國門之日。風壇黯慘。因憶家居時。夢吟狂風吹白水。淡日走黃沙之句。笑曰。人生誠有定數哉。抵家。因舊業數椽稍葺之。稱恬暢齋。奉太孺人之暇。與友人王義華。讀書吟咏其中。地甚狹。而有石有沼。有蘭有竹。有雜花。獨菊爲多。與義華手自修之。不使童僕。邑中有利害大端。及冤失職之甚者。乃出而慷慨頌言。居恆有司不得見也。公辛丑歸。至乙巳。上乃修播州之功。見職方陞敘加等。當事者不敢臆言。第謂公

當復官而已。然近年得罪上及執政都無復官者。公樂天知命。漠如也。平生無病。旦起如廁還。須臾而卒。遠邇聞之。莫不驚悼。公待宗族尤有恩。其爲工部。以使事過家。作族譜曰。吾爲令。嘗刻宗儀教民矣。夫族安可無譜也。譜以明世系。世系明則人知本源。而親睦之心生。每歲時上冢。輒與族人會食。綴和好。榮陽公漬病時輟。已而復舉行焉。伯父公安公絕後。表其墓。展祭無缺。他墓無碑者。皆代爲之。公自幼好學。歿身典雅。文詞蒼健。學李獻吉。賞識精妙。作令再預秋試。辛丑分較禮闈。皆稱得人。公生於嘉靖三十七年八月二日。卒於萬曆三十四年八月二十八日。得年四十九歲。配李封孺人。隆平州同李公女。生三子。長應辰。余壻也。次應明。府學廩生。娶王氏。趙州舉人洪度女。次應微。女二。一適魏進士純粹。一適魏文燭。孫男三。應辰出者二。庸周聘邑舉人白允升女。崇周幼。應明出者一。升吉。孫女一。許聘魏柏祥。卽魏進士之子。應辰出。應辰等卜以今年十二月之二十六日。葬公於邑南聖泉岡新塋。蓋余嘗爲滎陽公銘其墓矣。故不復言其先世。昔漢朱穆之歿也。蔡邕與其門人諡爲文忠。蓋好德之至。無所寄心也。而荀爽等非之。以爲諡者上之所贈。非下之所造。士修行立名。而不遇孔子。當末世窮困。人不珍行誼。欲無湮滅甚難。悲哉。善者不勸。中人退沮。豈私一人乎。公叔誠賢。牧冀州。得罪閹宦。輸作左較。太學生數千人上書救之。得免。此可不久。若張公者。行己有恥。見義必爲。而沈潛有略。當路必能匡時。臨難必能殉節。時莫能用。性命早隕。職方之功。大司馬不敢言。建儲之疏。留中。作史者未必採錄。夫張公也。而可無傳乎。此其人豈可易

得正人君子之稱。人之常言。無與於謚法。尊顯者易得謚。常爲人所嘲笑。位卑者德立而名不稱。余小子何敢不任其責焉。故題其墓曰明正人兵部職方司郎中張公之墓。而爲之銘曰。

乾剛坤直。篤生賢哲。幼心不童。匪澡而潔。踐雷思矩。跟險不跌。成孝忘生。事國盡節。世貴所難。在公非德。菲己厚民。姱於赤舌。幕畫折醜。佩之以玦。蠶績而烹。蜉蝣錦綴。異哉速化。厭世氛濁。譬諸仕者。見幾而作。帝或召之。授以仙爵。聰明維天。必非妄奪。誰能告之。解我結縉。誰起張公。紆我灼灼。謂公正人。則靡攸忤。

